

REGLUGERÐ

um þorskfisknet.

1. gr.

Á tímabilinu 1. janúar til 15. maí, skal lágmarksmöskvastærð þorskfiskneta, sem heimilt er að nota, vera 7 þumlungar (178 mm).

Á tímabilinu 16. maí til 31. desember skal lágmarksmöskvastærð þorskfiskneta, sem heimilt er að nota, vera 6 þumlungar (152 mm).

2. gr.

Þegar möskvi er mældur, skal hann teygður horna á milli eftir lengd netsins. Skal þá flöt mælistika, sem er jafnbreið leyfilegri lágmarksmöskvastærð (sbr. 1. gr.) og 2 mm þykk, komast auðveldlega í gegnum möskvann, þegar netið er vott.

3. gr.

Allir netadrekar skulu ávallt greinilega merktir umdæmisbókstöfum og tölum þeirra skipa, sem nota þá. Merki þessi skulu vera soðin á netadrekanana.

4. gr.

Netabaujur skulu vera á báðum endum netatrossu og skulu allar netabaujur merktar með flaggi, sem komið er fyrir efst á baujustönginni. Á flaggið skal mála umdæmisbókstafi og tölur þess skips, sem notar netin. Auk þessa er heimilt að auðkenna flaggið með merki skipsins. Undir fyrrnefndu flaggi skal komið fyrir öðru flaggi þar sem á er málað númer hverrar netatrossu þannig, að allar netatrossur skipsins séu tölusettar frá einum og til þess fjölda, sem skipinu er heimilt að nota samkvæmt 9. gr. reglugerðar þessarar. Auk þessa skulu allir belgir merktir með umdæmisbókstöfum og tölum þess skips, sem notar þá.

5. gr.

Merkingar á baujuflöggum og belgjum skulu vera greinilegar og skulu stafir stórir og skýrir.

6. gr.

Verði breytingar á umdæmisbókstöfum eða tölum skips, ber að breyta merkingum á veiðarfæraútbúnaði í samræmi við þá breytingu.

7. gr.

Þegar netadrekar, netabaujur og belgir eru um borð í veiðiskipi, skulu þau vera merkt í samræmi við 3.—5. gr., eftir því sem við á.

8. gr.

Skipstjóra skal skylt að merkja net sín þannig, að glöggst megi greina, hvor endi netatrossu sé austur- eða vesturendi og er þá miðað við réttvísandi norður- og suður-línu. Skal merking framkvæmd á þann hátt, að á miðju baujustangar á vestari enda trossu skal komið fyrir netahring (flot), sem hæglega má losa og færa milli bauju. Leggi skip net sín á svæði þar sem togveiðar eru heimilar er skipstjóra skylt að auðkenna vestari enda netatrossa með hvítu blökkiljósi.

9. gr.

Skipum, sem hafa 12 menn eða fleiri í áhöfn skal óheimilt að hafa fleiri en 150 net í sjó.

Sé áhöfn 11 menn skulu ekki fleiri en 135 net í sjó.

Sé áhöfn 10 menn skulu ekki fleiri en 120 net í sjó.

Sé áhöfn 8 eða 9 menn skulu ekki fleiri en 105 net í sjó.

Sé áhöfn 6 eða 7 menn skulu ekki fleiri en 90 net í sjó.

Sé áhöfn 5 menn skulu ekki fleiri en 75 net í sjó.

Sé áhöfn 4 menn skulu ekki fleiri en 60 net í sjó.

Sé áhöfn 3 menn eða færri skulu ekki fleiri en 45 net í sjó.

Takmörkun þessi á netafjölda í sjó miðast við 60 faðma langa slöngu.

10. gr.

Um páska skal haga veiðum þannig, að á tímabilinu frá og með skírdegi til og með páskadegi, skal hámarksfjöldi leyfðra neta í sjó vera fjórðungi færri en segir í 9. gr. og gildir þetta um alla þargreinda flokka.

11. gr.

Þorskfisknet skulu lögð í eina stefnu í sama veiðisvæði, eftir því sem við verður komið.

12. gr.

Týni skip þorskfisknetum í sjó, ber skipstjóra að reyna að slæða þau upp. Takist það ekki skal hann tilkynna það til Landhelgisgæslunnar og skýra frá staðsetningu netanna, eins nákvæmlega og unnt er.

13. gr.

Eigi ná ákvæði reglugerðar þessarar til fiskveiða í þágu vísindalegra rannsókna.

14. gr.

Auk almenns eftirlits Landhelgisgæslu með veiðum og veiðarfærum hafa sérstakir eftirlitsmenn sjávarútvegsráðuneytisins eftirlit með því, að ákvæðum reglugerðar þessarar sé fylgt og skal skipstjóri veiðiskips gera eftirlitsmanni kleift að gera þær athuganir á veiðarfærum skipsins, er hann telur nauðsynlegar.

15. gr.

Brot á ákvæðum reglugerðar þessarar varða viðurlögum samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands. Með mál út af brotum skal farið að hætti opinberra mála.

16. gr.

Reglugerð þessi er sett samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands til að öðlast þegar gildi og birtist til eftirbreytni öllum þeim, sem hlut eiga að máli.

Jafnframt eru felldar úr gildi reglugerð nr. 51 23. mars 1972, um verndun fiskimiða fyrir veiði með þorskfisknetum, reglugerð nr. 392 31. desember 1974, um möskvastærð og útbúnað þorskfiskneta, og reglugerð nr. 357 21. nóvember 1974, um merkingu þorskfiskneta.

Ákvæði til bráðabirgða.

Þrátt fyrir ákvæði 1. gr. reglugerðar þessarar er heimilt á tímabilinu 16. maí til 31. desember 1978, að nota þorskfisknet með lágmarksmöskvastærðinni 5½ þumlungur (140 mm), enda hafi þeirra verið aflað eða ráðstafanir gerðar til að afla þeirra fyrir gildistöku reglugerðar þessarar.

Sjávarútvegsráðuneytið, 13. mars 1978.

Matthías Bjarnason.

Jón B. Jónasson.

AUGLÝSING

um gildistöku laga nr. 44 20. maí 1975 um breyting á lögum um framsal sakamanna til Danmerkur, Finnlands, Noregs og Svíþjóðar, nr. 7 14. mars 1962.

Ákvæðið hefur verið samkvæmt heimild í 6. gr. laga nr. 44 20. maí 1975, um breyting á lögum um framsal sakamanna til Danmerkur, Finnlands, Noregs og Svíþjóðar, nr. 7 14. mars 1962, að þau lög skuli öðlast gildi gagnvart Danmörku, Finnlandi, Noregi og Svíþjóð hinn 1. apríl 1978.

Dóms- og kirkjumálaráðuneytið, 17. mars 1978.

F. h. r.

Baldur Möller.

Jón Thors.